

Uunga siunnersuut: Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaliuinermi iliuusissat pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxxx 2012-imeersoq

(Ineqarnermut, Attaveqarnermut Angallannermullu Naalakkersuisoq)

pillugu

Sanaartornermut Avatangiisinullu ataatsimiititaliap

ISUMALIUTISSIISSTAA.

Siunnersuutip aappassaaneerneqarneranut saqqummiunneqartoq.

Ataatsimiititaliap suliarinninnerani ilaasortat uku peqataapput:

Inatsisartunut ilaasortaq Juliane Henningsen, Inuit Ataqatigiit, Siulittaasoq
Inatsisartunut ilaasortaq Andreas Uldum, Demokraatit, Siulittaasup tullia
Inatsisartunut ilaasortaq Storm Ludvigsen, Inuit Ataqatigiit
Inatsisartunut ilaasortaq Knud Fleischer, Kattusseqatigiit Partiat
Inatsisartunut ilaasortaq Malik Berthelsen, Siumut
Inatsisartunut ilaasortaq Anders Olsen, Siumut
Inatsisartunut ilaasortaq Kim Kielsen, Siumut

Ulloq 27. september 2012-mi UKA 2012-p nalaani siullermeerneqareermat Ataatsimiititaliap siunnersuut misissorpa.

Siunnersuutip imaa aamma siunertaa

Inatsisisatut siunnersuummi sorsuttoqarnerani sorsuttoqarnissaanullu aarlerinartoqarnerani pilersaarusiornissamut piginnaatitaaffiup pisortatigoortumik nunatsinnit tiguneqarnissaata piareersarneqarnissaa siunertarineqarpoq. Kalaallit Nunaanni upalungaarsimanermut inatsit pillugu nassuaammi Inatsisartunut ilaasortanut 25. april 2012-imi agguaanneqartumi suleqatigiissitap inassuteqaatai kingulliit inatsisisatut siunnersuutikkut suliarineqarput. Taamaalilluni suliassaqarfinnut akisussaasuunermut tunngaviusoq Namminersorlutik Oqartussanit tiguneqarsimasunit Kalaallit Nunaanni susassaqarfinnit tamakkiisumik

ingerlanneqarsinnaalerpoq. Suliassaqarfinnut akisussaasuunermut tunngaviusooq paasineqassaaq tassaasoq oqartussaasut, suliffeqarfip sullissiviilluunniit, ulluinnarni suliassaqarfimmut akisussaaffeqartup aamma annertunerusunik ajutoortoqartillugu ajunaarnersuaqartilluguluunniit suliassaqarfimmut akisussaaffeqarnerat. Taamaalilluni ilutigalugu sorsuttoqarneranik sorsuttoqannginneranillu immikkoortitsisarneq Kalaallit Nunaanni upalungaarsimanermik pilersaarusrusiornermi atorunnaassaaq.

Siunnersuutip inatsisartuni siullermeerneqarnera

Inatsisisatut siunnersuut Inatsisartunit siamasissumik tapersorsorneqarpoq. Siunnersuut Ataatsimiititaliamut innersuunneqarpoq, inatsisisatut siunnersuummut kommunit tusarniaanermit akissutaanni erenumassutigisat pillugit Ataatsimiititaliamit isummersortoqarnissaa siunertaralugu.

Tusarniaanermit akissutit

Siunnersuut piffissami ulluni 27. junimit 11. julimut tusarniaassutigineqarsimasoq Ataatsimiititaliap maluginiarpa. Taamaalilluni tusarniaanermit piffissaliineq sap. ak.-nik marlunnik sivisussuseqarsimavoq, tamannalu sivikingaatsiarpoq, ingammik tusarniaanermi piffissaliussaq sulinngiffeqarnerup nalaaniissimamat. Tamatumunnga atatillugu tusarniaanermi piffissaliineq pillugu ataatsimut isigalugu eqqarsaatersuutinik Ataatsimiititaliaq saqqummiusserusuppoq. Inatsisartut Inatsisinut ataatsimiititaliaata UPA 2000/9-p suliarineqarnerani tusarniaanermik piffissaliinerit nalinginnaasumik sivikinnerpaamik sap. ak.-ni sisamanit sivikinnerusunngorlugit aalajangerneqartariaqanngitsut oqaatigisimavaa. Taamaattorli siunnersuutip katitigaanerata annertussusaatalu tusarniaanermi piffissaliinerup sivitsorneqarnissaa tigussaasumik pissutissaqartissinnaavaa. Taamatuttaaq piffissaliussaq sivitsorneqassaaq tusarniaanermi piffissaliineq sulinngiffeqarnerup nalaaniippat. Inatsisinut nassuaatinut najoqquṭassat atuuttut malillugit tusarniaanermi piffissaliineq tunngaviatigut sivikinnerpaamik sap. ak.-inut sisamanut aalajangerneqartarpoq, sulinngiffeqarnerullu nalaani sap. ak.-inut arfinilinniit arfineq pingasunut.

Siunnersuummut uunga atatillugu Ataatsimiititaliap maluginiarpa siunnersuut tusarniaassutigalugu nassiunneqannginnerani KANUKOKA-p sap. ak.-inik marlunnik tusarniaanermit piffissaliineq akuersaarsimagaa. Taamaalilluni KANUKOKA-mut aamma kommuninut atatillugu tusarniaanermik piffissaliineq sivikitsoq toqqaannartumik assuarliutigissallugu pissutissaqanngitsoq Ataatsimiititaliaq isumaqarpoq, taamaattorli tusarniaanermit sivikitsumik piffissaliineq pissutigalugu siunnersuutip sunniutissaanut – ingammik aningasaqarnikkut sunniutissanut – isummernissaq periarfissaasimanngitsoq kommunit arlallit tusarniaanermi akissutiminni taavaat.

Tusarniaanermit sivikitsumik piffissaliineq aamma tusarniarneqartut sinnerinit upuarneqarpoq. Taamaattumik inatsisiliornermut atatillugu tusarniarneqartut tusarniaanermi

naammaattumik piffissalerneqartarnissaannut isumannaarinissamut Ataatsimiititaliap Naalakkersuisut kaammattorpai.

Ataatsimiititaliap siunnersuummik suliaqarnera

Siunnersuutip nassuaatitaani nalinginnaasuni takuneqarsinnaavoq, ajornartoornermi sorsuttoqarneraniluunniit suliassat isumagineqarnissaat siunertaralugu pilersaarusiortarneq, oqartussaasut ulluinnarni suliassanik isumaginnitarnerinut, kiisalu ajutoortoqarnerani ajunaarnersuaqarneranilu suliassat pineqartut isumagineqarnerisa ingerlaannarnissaannut pilersaarusiortarnermut qanittumik atasuusoq. Taamaalilluni suliassaqarfinni Namminersorlutik Oqartussanit tiguneqareersimasuni pilersaarusiortarneq ataatsimut isigalugu ajutoortoqartillugu, ajunaarnersuaqartillugu sorsuttoqartilluguluunniit pisoq apeqqutaatinnagu taamaaginnassaaq. Taamaattumik isumalluutit ajutoortoqarneranit ajunaarnersuarnillu pilersunut atugassat, annertunerpaatigut taakkuupput sorsuttoqarnerata sorsuttoqarnissaanulluunniit aarlerinartorsiornermi kingunerisaanik ajoquernernut atorneqartussat. Tamanna tunngavigalugu inatsisisstatut siunnersummi nalilerneqarpoq, nunatsinnut nuussineq pisortanut aningaasaqarnikkut aqtsinikkullu sunniuteqassanngitsoq.

Taamaattorli KANUKOKA-p kommunillu tamatumunnga atatillugu uparuarpaa, siunnersuutip nunatsinnut nuunneqarnerani kommunit upalungaarsimanermut pilersaarutit allanngortissagaat, upalungaarsimanermillu ilinniartitaanermi sungiusarnermilu akussaaffeqarfiit nutaat ilanngussuunneqarnissaat pisariaqassasoq. Tamanna tunngavigalugu kommunit KANUKOKA-lu isumaqarput, kommunit naliliinerat aallaavigalugu akissaajaatit piviusorpalaartut ataatsimoortumik tapiissutit isumaqatigiinniutigineqarnissaannut ilanngunneqartariaqartut.

Inatsisisstatut siunnersuut aamma tusarniaanermit akissutit tunngavigalugit Nunatsinnit tigusineq kommuninut aningaasartuuteqarnerunermik kinguneqassanersoq Ataatsimiititaliap nalilersinnaanngila, sorsuttoqarneranimi sorsuttoqarnissaanulluunniit aarlerinartorsiornermi kommunit upalungaarsimanermut suliassaasa kiisalu ajutorernit aamma ajunaarnersuarnit maanna kommunit suliassaasa assigiinngissuteqarnerannik tigussaasumik assersuutissaqanngimmat.

Inatsisisstatut siunnersuut kommuninut aningaasartuutaanerusussatut kinguneqassagaluarpat, tamanna kommunit aamma Namminersorlutik Oqartussat akornanni ataatsimoortumik tapiissutit isumaqatigiinniutigineqarnerannut ilanngunneqassasoq Ataatsimiititaliap kaammattutigaa.

Siunnersuummut tusarniaassutigineqartumut atatillugu, KANUKOKA-p aamma kommunit § 7 maanna ilusimisut ingerlateqqinnejassasoq pillugu kissaateqarnertik oqaatigaat. Siunnersummi ilaatigut siunnersuutaavoq, upalungaarsimanermut pisortap sanaartukkut

pillugit sullissinermi ikuallattoornissamut teknikkimut tunngasumik ilinniarsimasuunissa
pillugu § 7, imm. 4-mi piumasaqaataasoq peerneqassasoq. Aamma kommunit KANUKOKA-
llu kaammattutigaat, inatsisissatut siunnersuutip ilaani aarlerinartoqarneranik
tunngaveqartumik annertussusiliineq kommunit upalungaarsimanerann
ilanngunneqassanngitsoq, kisiannili kingusinnerusumut kinguartinneqassasoq.
Tamatumunnga atatillugu Ataatsimiititaliap maluginiarpa, KANUKOKA-p aamma
kommunit kaammattuutaat Naalakkersuisunit malinnejqarsimasut. Naalakkersuisut naliliippit,
aarlerinartoqarneranik tunngaveqartumik annertussusiliinermik atuutilersitsinissap
isummersorfigereernissaata, aamma annertunerusumik ilinniartitaanerit aalajangersarnissaasa
kiisalu Naalakkersuisut, kommunit ataasiakkaat KANUKOKA-llu akornanni
annertussusiliinermik isumatigiissuteqarnissaasta tungaanut, kommunit
upalungaarsimanerann aarlerinartoqarneranik tunngaveqartumik annertussusiliinerup
atuutilersinnerata kiisalu § 7-ip allanngortinnerata kinguartinneqarnissaat pisariaqartoq.

Siunnersuummi tusarniaassutitut nassiunneqartumi annaassiniartarnermik
upalungaarsimanermik annertussusiliineq Naalakkersuisunit kommuninut tunniunneqassasoq
siunnersuutigineqarpoq, tamatumalu kingunerissavaa, ulluinnarni upalungaarsimaneq
kommunimi mianerisassat nalilerneqarnerat kiisalu communalbestyrelsip nalileereerneratigut
isiginagiassat aallaavigalugit, kommunit ulluinnarni upalungaarsimaneq aaqqissuutissagaat.

Upalungaarsimanermut pilersaarutit inatsisitigut pisussaaffigineqartut, Inatsisartullu inatsisaat
nr. 14, 26. maj 2010-meersumi piumasaqaataalersut, kommunillu tamatumunnga atatillugu
aninaasatigut pissarsissutigisimasaat, suli suliarineqarsimanninnerat Ataatsimiititaliap
ernumanartutut isigaa. Peqatigitillugu kommunit maanna kinguaattoorutaat kommunit
annaassiniarnissamut upalungaarsimasunik naleqqussaanissamut/annertussusiliinissamut
akisussaaffimmik tigusinissaannut maannakkorpiaq akornutaasut pillugit Naalakkersuisut
naliliinerannut Ataatsimiititaliaq isumaqataavoq.

Taamaattumik upalungaarsimanermut pilersaarutit inatsisitigut pisussaaffiusut piffissap
naammaginartumik sivisussusillip ingerlanerani kommuninit suliarineqareersimanngippata
suliarineqarnissaannut Naalakkersuisut suliniuteqassasut Ataatsimiititaliap kaammattorpi.

Siunnersuutip aningaasaqarnikkut sunniutissai

Siunnersuutip nassuaatitaani nalinginnaasuni siunnersuutip akuerineqarneratigut
aningaasaqarnikkut sunniuteqassanngitsoq allassimavoq. Tamanna tunngavigalugu allatut
naliliinissamut Ataatsimiititaliaq tunngavissaqanngilaq.

Ataatsimiititaliap inassutai

**Ataatsimiititaliaq isumaqatigiittoq inatsisissatut siunnersuutigineqartoq
akuerineqassasoq inassuteqarpoq.**


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap
siunnersuut aappassaaniigassanngortippaa.



Juliane Henningsen
Siulittaasoq




Kim Kielsen



Andreas Uldum



Malik Berthelsen



Storm Ludvigsen



Anders Olsen



Knud Fleischer